

ANG PAGPAHIULI SA EBANGHELYO NI JESUKRISTO





ANG DIOS IMONG MAHIGUGMAONG LANGITNONG AMAHAN

Ang Dios mao ang imong Amahan sa Langit. Siya personal nga nakaila kanimo ug nahigugma kanimo labaw pa kay sa imong masabut. Siya buot nga ikaw magmalipayon dinhi niining kinabuhia ug sa kahangturan.

Aron sa paglampos niini nga katuyo-an, Siya mihatag og usa ka plano nga gitawag og **ebanghelyo*** ni Jesukristo. Si Jesukristo mao ang Anak sa Dios; ang Iyang kinabuhi ug mga pagtulunan mao ang giya sa kalinaw niini nga kalibutan ug hingpit nga kalipay sa kahangturan.

ANG EBANGHELYO NAGPANALANGIN SA MGA PAMILYA UG SA MATAG-USA

Ang ebanghelyo ni Jesukristo nagpanalangin sa tanan kinsa modawat ug mosunod niini. Usa sa labing maayong dapit sa pagtudlo ug paggamit sa ebanghelyo anaa diha sa mga pamilya. Ang Dios mitukod og mga pamilya aron pagdala og kalipay ngadto sa Iyang mga anak, aron sa pagtugot kanato nga makakat-on og husto nga mga baruganan diha sa usa ka mahigugmaong palibut, ug aron sa pag-andam kanato sa pagbalik ngadto kaniya human kita mamatay. Bisan og ang mga relasyon sa pamilya usahay malisud, ang atong Langitnong Amahan nagpanalangin kanato samtang kita naninguha sa pagsunod sa mga pagtulunan ni Jesukristo. Kini nga mga pagtulunan nagtabang kanato sa paglig-on sa atong mga pamilya.

ANG LANGITNONG AMAHAN MIPADAYAG SA IYANG EBANGHELYO

Isip kabahin sa Iyang plano, ang Dios nagpili og mga propeta, sama nila ni Adan, Noe, Abraham, ug Moises. Ang mga Propeta:

- Nagtudlo mahitungod sa Dios ug linain nga mga saksi sa Iyang Anak nga si Jesukristo.
- Nagdawat og **pagpadayag**, o direksyon gikan sa Ginoo.
- Nagtudlo sa ebanghelyo ngadto sa kalibutan ug naghubad sa pulong sa Dios.

**Mga pulong nga pula gihubad sa pahina 18 ug 19.*

Ang atong Langitnong Amahan midala pagbalik—mipahiuli—sa mga balaang kamatuoran nga imong makat-unan ug masunod. Kini nga mga kamatuoran gipadayag ngadto sa mga propeta gikan sa sinugdan.

Ang mga propeta adunay **priesthood**, o ang katungod sa pagpamulong ug pagbuhat diha sa ngalan sa Dios aron sa paggiya sa Iyang mga anak. Ang mga tawo kinsa mosunod sa mga propeta makadawat sa mga panalangin nga gisaad sa Dios. Kadto kinsa mosalikway sa ebanghelyo ug sa mga propeta sa Dios mawad-an niana nga mga panalangin ug mopalayo sa ilang kaugalingon sa Dios. Kadto mosalikway sa mga propeta ug mobiya sa ilang pasalig sa pagsunod sa Dios anaa sa kahimtang nga gitawag og **apostasiya**.


*Pinadayag nga mga kama-
tuoran nawala samtang ang
mga tawo misalikway sa
mga propeta.*

Bisan tuod daghan sa Iyang mga anak misalikway sa makadaghan kaniya ug sa Iyang mga propeta, ang atong Langitnong Amahan nagpadayon sa paghigugma sa Iyang mga anak. Buot niya nga kita mahatagan sa tanan natong gikinahanglan nga malipay karon ug makabalik ngadto Kaniya human ki-

ta mamatay. Ang mga kasulatan naghatag og sumbanan diin ang Dios sa makadaghan nakigsulti ngadto sa Iyang mga anak, bisan gani kon kita dili kanunay mamati kaniya:

- Ang Dios mopili og propeta.
- Ang propeta motudlo sa ebanghelyo ug mogiya sa mga tawo.
- Ang Dios mopanalangin sa mga tawo.
- Ang mga tawo sa hinay-hinay mibaliwala o misupak sa mga pagtulun-an sa propeta. Sa kadugayan sila misalikway sa propeta ug sa iyang mga pagtulun-an ug midangat ngadto sa apostasiya.
- Tungod sa apostasiya, ang mga tawo nawad-an og kahibalo sa ebanghelyo. Ang katungod sa priesthood gikuha gikan kanila.
- Kon tukma na ang panahon ug ang mga tawo andam na sa pagsunod Kaniya pag-usab, ang Dios magpili og lain nga propeta, ipahiuli ang priesthood ug ang simbahan, ug giyahan ang propeta sa pagtudlo sa ebanghelyo.

**Mga pulong nga pula gihubad sa pahina 18 ug 19.*





SI JESUKRISTO MITUKOD SA IYANG SIMBAHAN

Sukad sa panahon sa Paglalang, ang mga anak sa Dios naglantaw sa pag-abut sa Manluluwas nga si Jesukristo. Sumala sa Iyang saad, ang atong Langitnong Amahan mipadala sa Iyang Anak, si Jesukristo, sa kalibutan sobra sa 2,000 ka tuig na ang milabay.

Si Jesukristo nagpuyo og perpekto, walay sala nga kinabuhi. Siya mitukod sa Iyang Simbahan, mitudlo sa Iyang ebanghelo, ug mihimo og daghang mga milagro. Siya mipili og napulog duha ka mga lalaki nga Iyang mga **Apostoles**, lakip ni Pedro, Santiago, ug Juan. Siya mitudlo kanila ug mihatag kanila og katungod sa priesthood aron sa pagtudlo diha sa Iyang ngalan ug sa pagpahigayon sa mga sagra-dong **ordinansa**, sama sa **bunyag**.

Sa diha nga si Jesus mitukod sa Iyang Simbahan, Siya midawat og mga instruksyon gikan sa atong Langitnong Amahan. Siya human niana mihatag og instruksyon sa Iyang mga tinun-an o disipulo. Si Jesus mitudlo sa Iyang mga sumusunod nga ang pagpadayag gikan sa Dios mao ang lig-on nga bato o sukaranan diin Siya motukod sa Iyang Simbahan.

Sa katapusan sa Iyang kinabuhi, si Jesukristo nag-antus ug namatay alang sa mga sala sa matag tawo kinsa mipuyo o mopuyo dinhi sa yuta. Kini nga sakripisyo gitawag og **Pag-ula** [Atonement]. Pinaagi sa Iyang pag-antus, kamatayon, ug **Pagkabanhaw**, ang Manluluwas mihimo nga kita mahimong mapasaylo. Kadto kinsa adunay hugot nga pagtuo kaniya, maghinulsol, ug maghupot sa Iyang mga kasugoan makadawat og kapasayloan sa mga sala ug mapuno sa kalinaw ug hingpit nga kalipay.

Si Jesukristo mitukod sa Iyang Simbahan:

- *Siya mitawag ug mi-ordinar og mga Apostoles.*
- *Siya mihatag kanila sa Iyang katungod sa pagtudlo ug pagbunyag. Kini nga katungod gitawag og priesthood.*
- *Human sa Iyang pagkamatay ug Pagkabanhaw, Siya mipadayon sa paggiya sa mga Apostoles pinaagi sa pagpadayag.*

*Mga pulong nga pula gihubad sa pahina 18 ug 19.

Human sa Iyang Pagkabanhaw, si Jesukristo migiya sa Iyang mga Apostoles pinaagi sa pagpadayag. Ang Biblia nagrekord og daghang mga paagi diin Siya mipadayon sa paggiya sa Iyang Simbahan (tan-awa sa Mga Buhat 10; Pagpadayag 1:1). Busa ang Simbahan ni Jesukristo gipangulohan sa Dios ug dili sa mga tawo.

ANG DAKONG APOSTASIYA

Human sa pagkamatay ni Jesukristo, daghang mga sakop sa Simbahan gigukod ug gipangpatay sa mga dautang tawo. Ang ubang mga sakop sa Simbahan hinay-hinay nga mipalayo sa mga

baruganan nga gitudlo ni Jesukristo ug sa Iyang mga Apostoles. Ang mga Apostoles gipamatay, ug ang mga katungod sa priesthood—lakip ang mga yawe sa pagdumala ug pagdawat og pagpadayag alang sa Simbahan—gikuha gikan sa yuta. Tungod kay ang Simbahan wala na pangulohi pinaagi

*Urban sa pagkamatay
sa mga Apostoles ni
Jesukristo, ang kamatuoran
nawala na usab.*

sa katungod sa priesthood, mga sayop hinay-hinay nga misulod sa mga pagtulun-an sa Simbahan. Mga maayo nga tawo ug daghang kamatuoran nagpabilin, apan ang ebanghelyo ingon nga gitukod ni Jesukristo nawala. Kini nga panahon mao ang gitawag og Dakong Apostasiya.

Kining apostasiya misangput sa pagtukod sa daghang mga simbahan nga nagkabangi ang mga pagtulun-an. Sulod niini nga panahon, daghang mga lalaki ug mga babaye nangita sa kamatuoran, apan wala kini hikaplagi. Daghang mga maayong tawo mituo sa Dios ug ni Jesukristo ug naninguha sa pagsabut ug sa pagtudlo sa kamatuoran, apan wala kanila ang hingpit nga ebanghelyo o katungod sa priesthood. Agi og sangputanan, ang matag henerasyon nakapanunod og usa ka kahimtang sa apostasiya kay ang mga tawo na-impluwensya sa unsay napanunod lakip ang mga kausaban sa ebanghelyo ni Kristo.

Pipila sa dinasig nga mga tawo, sama ni Martin Luther ug John Calvin, nakakita nga ang mga kalihokan ug mga doktrina gipangusab o nawala. Sila misulay sa pagtarong sa mga simbahan diin sila nahisakop. Kon walay katungod sa priesthood, bisan pa niana, ang ebanghelyo ni Jesukristo dili na ikabalik ngadto sa orihinal nga kahimtang. Usa ka **pagpahiuli** ang gikanahanglan.

*Mga pulong nga pula gihubad sa pahina 18 ug 19.

*Ang Dios nasayud nga adunay
pahimulag o apostasiya. Pinaagi sa usa ka
propeta sa Daang Tugon, Siya miingon:*

*“Moabut ang panahon nga padad-an
kog gutom ang nasud. Gutomon ang
katawhan apan dili sa pan, uhawon sila
apan dili sa tubig. Gutomon sila sa
mensahe gikan sa GINOO:*

*“Ang katawhan maluya ug magsuroysu-
roy gikan sa amihanan paingon sa silanga-
nan, aron pagpangita sa mensahe sa
GINOO, apan dili sila makakaplag niini.”*

Amos 8:11–12



ANG PAGPAHIULI SA EBANGHELYO

Niadtung 1820, sama sa Iyang gihimo sa tanang kasaysayan, ang atong Amahan sa Langit mipili na usab og usa ka propeta aron sa pagpahiuli sa ebanghelyo ug sa priesthod nganhi sa yuta. Ang ngalan niana nga propeta mao si Joseph Smith. Isip usa ka batan-on nga lalaki, si Joseph nabilug sa mga kalainan sa daghang mga simbahan diha sa iyang dapit ug buot magpakisayud kon hain nga simbahan ang tinuod. Sayud nga siya kulang sa kaalam, siya misunod sa tambag nga makita diha sa Biblia, “Kon aduna man kaninyoy nakulangan og kaalam, papa-ngayoa siya sa Dios nga nagapanghatag ngadto sa tanang mga tawo sa madagayaon gayud, ug sa walay pagpamoyboy; ug kini igahatag kaniya.” (Santiago 1:5).

Si Joseph Smith mihukom sa pagpangutana sa Dios kon unsay kinahanglan niyang buhaton. Sa dihang nag-ampo si Joseph nga makahibalo sa kamatuoran, ang atong Langitnong Amahan ug si Jesukristo nagpakita kaniya. Si Jesus misulti kang Joseph sa dili pagpasakop sa bisan hain nga simbahan, tungod kay “silang tanan mga sayop” ug “sila nagpaduol ngari kanako uban sa ilang mga ngabil, apan ang ilang mga kasingkasing layo gikan kanako, sila nagtudlo og mga doktrina nga mga sugo sa mga tawo, nga may hulagway sa pagka-diosnon, apan sila nanghimakak sa gahum niana” (Joseph Smith—Kasaysayan 1:19).

Sama sa gibuhat sa Dios ngadto ni Adan, Noe, Abraham, Moises, ug ubang mga propeta, Siya mitawag ni Joseph Smith nga mahimong propeta nga pinaagi kaniya ang ebanghelyo napahiuli.

Si Joseph Smith nakakita sa atong Langitnong Amahan ug ni Jesukristo. Niini nga kasinatian, siya miingon:

“Ako nakakita og usa ka dako nga gilis sa kahayag ibabaw gayud sa akong ulo, labaw sa kahayag sa adlaw, nga nag-anam og paubos hangtud kini midapat kanako. . .

“Sa diha nga ang kahayag midapat kanako ako nakakita og duha ka Personahe, kansang kahayag ug himaya dili mahulagway, nagtindog ibabaw kanako diha sa kawanangan. Usa kanila misulti ngari kanako, nagtawag kanako sa akong ngalan ug miingon, nagtudlo ngadto sa lain—Kini mao ang Akong Hinigugmang Anak. Paminaw Kaniya!”

**Joseph Smith—Kasaysayan
1:16–17**

Ang Pagpahiuli sa Priesthood

Niadtong 1829, si Joseph Smith midawat sa samang katungod sa priesthood nga gihatag ni Jesukristo ngadto sa Iyang mga Apostoles. Si Juan Bautista, kinsa mibunyang ni Jesus, nagpakita kang Joseph Smith ug mihatag kaniya sa **Aaronic Priesthood** o ubos nga priesthood. Si Pedro, Santiago ug Juan (tulo sa mga orihinal nga Apostoles ni Jesukristo) sa wala madugay nagpakita kang Joseph Smith ug mihatag kaniya sa **Melchizedek Priesthood**, o labaw nga priesthood.

Human siya midawat sa katungod sa priesthood, si Joseph Smith gimandoan sa pagtukod og balik sa Simbahan ni Jesukristo dinhi sa yuta. Pinaagi kaniya, si Jesukristo mibalik pagtawag og Napulog Duha ka mga Apostoles.

Si Jesukristo mipadala ni Juan Bautista ug dayon tulo sa Iyang mga Apostoles sa paghatag ngadto ni Joseph Smith sa Katungod sa priesthood.

Sama nga si Jesukristo nangulo sa Iyang mga Apostoles pinaagi sa pagpadayag human sa Iyang Pagkabanhaw, Siya nagpadayon sa paggiya sa Simbahan karon pinaagi sa buhing mga propeta. Ang Presidente sa Ang Simbahan ni Jesukristo sa mga Santos sa Ulahing mga Adlaw mao ang pinili nga propeta sa Dios karong panahona. Siya, iyang mga magtatambag, ug ang Napulog Duha ka mga Apostoles naghupot sa

katungod sa priesthood nga gihuptan sa tanang mga propeta ug mga apostoles sa nanglabay nga mga panahon. Kining mga tawha-na nga propeta, mga manalagna, ug mga tigpadayag.

*Mga pulong nga pula gihubad sa pahina 18 ug 19.

Si Pedro, Santiago, ug Juan—Mga Apostoles ni Jesukristo—Mitugyan sa Melchizedek Priesthood diha ni Joseph Smith.





ANG BASAHON NI MORMON

Isip kabahin sa Pagpahiuli sa ebanghelyo, ang Dios mipatungha sa Basahon ni Mormon: Lain nga Testamento ni Jesukristo. Pinaagi sa gahum sa Dios, gihubad ni Joseph Smith ang basahon gikan sa karaang talaan nga gisulat diha sa bula-wan nga mga palid. Ang Basahon ni Mormon maoy “usa ka talaan sa Dios sa iyang mga pakigdumala sa karaang mga lumulupyo sa mga Amerika ug naglakip sa kahingpitan sa walay katapusan nga ebanghelyo” (pasiuna sa Basahon ni Mormon).

Ang Basahon ni Mormon usa ka gamhanang saksi ni Jesukristo. Kini nagtabang kanato sa pagsabut sa Iyang mga pagtulunan, lakip na niadtong anaa sa Biblia.

Ang Basahon ni Mormon usa ka makapatuo nga ebedensya sa Pagpahiuli sa ebanghelyo pinaagi ni Joseph Smith. Ikaw masayud sa imong kaugalingon nga ang Basahon ni Mormon tinuod. Aron pag-angkon niini nga kahibalo, ikaw kinahanglang mobasa niini, mopalandong sa mensahe niini, ug motinguha sa pagpakisayud kon kini tinuod ba gayud. Ikaw kinahanglang mag-ampo sa imong Langitnong Amahan sa pagmatuod nga kini Iyang pulong. Samtang ikaw mohimo niini, Siya mopadayag kanimo pinaagi sa **Espiritu Santo** nga kini tinuod.

Kon moabut nga ikaw masayud nga ang Basahon ni Mormon tinuod, moabut usab nga ikaw masayud pinaagi sa Espiritu Santo nga si Joseph Smith usa ka propeta sa Dios, nga ang ebanghelyo ni Jesukristo gipahiuli pinaagi kaniya, ug nga Ang Simbahan ni Jesukristo sa mga Santos sa Ulahing mga Adlaw gipangulohan sa usa ka propeta ug mga apostoles karong panahona.

Mahimo ikaw nga masayud nga ang gitudlo sa mga misyonaryo tinuod kon ikaw mobasa ug mag-ampo mahitungod sa Basahon ni Mormon:

“Kon kamo mangutana sa Kinasingkasing, uban sa tinuod nga katuyoan, nga may hugot nga pagtuo kang Kristo, siya mopakita sa kamatuoran niini nganha kaninyo, pinaagi sa gahum sa Espiritu Santo.”

“Ug pinaagi sa gahum sa Espiritu Santo kamo mahimo nga masayud sa kamatuoran sa tanan nga mga butang.”

Moroni 10:4-5

*Mga pulong nga pula gihubad sa pahina 18 ug 19.

UNSAON NAKO PAGKAHIBALO?

Ikaw masayud nga kining mensahe tinuod. Kon ikaw mangayo sa imong Langitnong Amahan diha sa pag-ampo, ikaw makadawat og tubag gikan Kaniya pinaagi sa Espiritu Santo. Ang Espiritu Santo

gitawag usab og Espiritu sa Dios, ug usa sa Iyang mga buhat mao ang pag-saksi o pagpamatuod, sa kamatuoran.

Unsaon Nako Pag-ampo?

- *Tawga ang imong Langitnong Amahan.*
- *Ipadayag ang mga pagbati sa imong kasingkasing (pasalamat, mga pangutana, mga hangyo sa pagmatuod sa kamatuoran sa Basahon ni Mormon ug sa unsay gitudlo sa mga misyonaryo).*
- *Taposa (“Diha sa pangalan ni Jesukristo, amen”).*

Kini nga kahibalo mahimong milagroso ug makausab sa kinabuhi, apan kini sa kasagaran moabut sama sa usa ka malinawon nga pasalig, walay kahibulongang pasundayag sa gahum sa Dios. Ang Espiritu Santo mopamatuod sa kamatuoran pinaagi sa mga pagbati, mga hunahuna, ug mga impresyon.

Ingon sa gitudlo sa Biblia, “Ang bunga sa Espiritu mao kini: ang gugma, kalipay, kalinaw, pailub, kalooy, kaayo, hugot nga pagtuo, pagkamatitud-anon, [ug] pagpugong sa kaugalingon” (Mga Taga-Galacia 5: 22–23). Kini nga mga pagbati nga gikan sa Espiritu Santo mga personal nga pagpadayag nganha kanimo nga ang ebanghelyo ni

Jesukristo nga gipahiuli pinaagi ni Joseph Smith tinuod. Ikaw dayon nagkinahanglan nga mopili kon ikaw mosunod subay sa kahibalo nga imong nadawat.



TALAAAN SA MGA PULONG

Aaronic Priesthood Ang ubos nga priesthood. Kini nga priesthood naglakip sa katungod sa pagbunyag ug gipangalan kang Aaron diha sa Daang Tugon sa Biblia.

Apostasiya Kon ang matag tawo, ang Simbahan, o ang tibuok nga mga nasud mosalikway o mobiya sa ebanghelyo ni Jesukristo. Ang Apostasiya moresulta sa panagbingkil, kalibug, ug pagkawala sa katungod sa priesthood, o ang pagtugot sa pagbuhat diha sa ngalan sa Dios.

Apostoles Ang ngalan nga gihatag ni Jesukristo ngadto sa napulog duha ka mga lalaki nga Iyang gipili isip Iyang labing suod nga mga kauban sa panahon sa Iyang pagpangalagad dinhi sa yuta ug ngadto kinsa Siya mihatag sa katungod sa pagbuhat diha sa Iyang ngalan. Sa bag-ong mga panahon, si Jesukristo nagtawag og laing mga lalaki nga moalagad ingon nga Iyang mga Apostoles. Sama sa unang mga panahon, ang Apostol maoy usa ka talagsaong saksi ni Jesukristo ug adunay katungod gikan Kaniya.

Bunyag Usa ka importanteng lakang sa pagdawat sa kapasayloan sa mga sala. Pinaagi sa bunyag ug kumpirma pinaagi sa katungod sa priesthood, kita mahimong mga sakop sa Ang simbahan ni Jesukristo sa mga Santos sa Ulahing mga Adlaw. Ang bunyag pinaagi sa pagpaunlod, nagpasabut nga ang tawo nga gibunyagan sa makadali iunlod sa tubig. Ang bunyag nagpakita sa atong pag-uyon sa pagsunod sa ehemplo ni Kristo ug sa paghimo og mga pakigsaad uban sa Dios.

Ebanghelyo Ang plano sa atong Langitnong Amahan sa pagtabang kanato nga makaangkon og giya sa kalinaw niini nga kalibutan ug hingpit nga kalipay sa kahangturan. Ang ebanghelyo gisentro diha sa Pag-ula ni Jesukristo ug nagkinahanglan kanatong magbaton og hugot nga pagtuo diha kaniya, maghinulsol, magpabunyag, modawat sa Espiritu Santo, ug molahutay ngadto sa katapusan.

Espiritu Santo Gitawag usab og Balaang Espiritu, ang Espiritu sa Dios, ug ang Maghuhupay. Siya nagsaksi, o nagpamatuod, sa Langitnong Amahan ug ni Jesukristo ug nagpadayag ug nagtudlo sa kamatuoran.

Melchizedek Priesthood Ang labawng taas o halangdong priesthood. Kini gipangalan kang Melchizedek diha sa Daang Tugon sa Biblia, kinsa usa ka matarung nga halangdong pari ug hari.

Ordinansa Usa ka sagrado, pormal nga kalihokan nga gihimo pinaagi sa katungod sa priesthood. Usa ka pananglitan mao ang bunyag.

Pagkabanhaw Human sa pisikal nga kamatayon, ang paghiusa og balik sa espiritu ngadto sa nahingpit nga pisikal nga lawas nga unod ug mga bu-kog. Si Jesukristo mao ang unang nabanhaw.

Pagpadayag Komunikasyon tali sa Dios ug sa Iyang mga anak, sa kasaga-ran pinaagi sa Espiritu Santo. Ang matag tawo makadawat og pagpadayag aron sa paggiya sa ilang mga kaugalingong kinabuhi, apan ang pinili la-mang nga propeta sa Dios ang makadawat og pagpadayag alang sa tibuok kalibutan. Ang Pagpadayag moabut sa daghang mga paagi, apan sa kasaga-ran kini moabut ingon og mga hunahuna, mga pagbati, ug mga impresyon.

Pagpahiuli Paghimo sa usa ka butang sama sa unang kahimtang; pagtu-kod pagbalik niini; pagdalag balik og usab. Human ang kamatuoran ug ka-tungod nawala gikan sa yuta, ang ebanghelyo gipahiuli pinaagi ni Propeta Joseph Smith. Ang Pagpahiuli lahi gikan sa repormasyon kay ang *pagrepor-ma* nagpasabut nga usbon ang anaa na nga organisasyon o kinaiyahan sa katuyoan nga ibalik kini ngadto sa iyang orihinal nga kahimtang, samtang ang pagpahiuli nagpasabut sa pagtukod pagbalik niini o pagdalag balik sa orihinal nga organisasyon o kinaiyahan diha sa iyang kinatibuk-an.

Pag-ula Ang hitabo nga naghimo kanato nga magkauli ngadto sa Dios. Ang pag-ula mao ang pag-antus sa silot sa sala, pinaagi niana nagkuha sa mga epekto sa sala gikan sa mga mahinulsulong makasasala. Si Jesukristo mao la-mang ang makaako sa pagbuhat og usa ka hingpit nga Pag-ula alang sa ta-nang katawhan. Ang Iyang Pag-ula naglakip sa Iyang pag-antus alang sa atong mga sala, ang pagpaagas sa Iyang dugo, ug sa Iyang kamatayon ug Pagkabanhaw. Tungod sa Pag-ula matag usa kinsa nabuhi mabanhaw. Ang Pag-ula naghatag usab kanato og paagi nga mapasaylo sa atong mga sala ug mopuyo sa kahangturan uban sa Dios.

Priesthood Ang katungod ug gahum sa Dios. Ang Dios naghatag niini nga gahum ngadto sa tawo sa pagbuhat diha sa Iyang ngalan. Ang Aaronic Priesthood gipahiuli ngadto ni Joseph Smith pinaagi ni Juan Bautista, kinsa mibunyag ni Jesus. Ang Melchizedek Priesthood gipahiuli ni Pedro, Santiago, ug Juan, tulo sa Napulog Duha ka mga Apostoles ni Jesus.

DUGANG PAGTUON

Ang mosunod nga mga pangutana ug mga kasulatan makatabang kani-mo sa pagkat-on og dugang mahitungod sa mga baruganan dinhi niining pamphlet ug sa pagpalandong kanila. Ang listahan wala maglakip sa tanan; ang mga *footnotes* ug mga *cross references* diha sa mga kasulatan mogiya kanimo ngadto sa dugang nga mga sinulat ug mga kapanguhaan.

Unsay imong pagsabut nga ang Dios mao ang imong Langitnong Amahan?

Malaquias 2:10 (Biblia, Daang Tugon)

Hebrohanon 12:9–10 (Biblia, Bag-ong Tugon)

Unsa ang trabaho sa usa ka propeta? Ngano nga importante nga masayud nga ang Dios namulong ngadto sa mga propeta?

Amos 3:7 (Biblia, Daang Tugon)

Jacob 4:4–6 (Basahon ni Mormon, mga pahina 180–181)

Unsay ipasabut sa pagbaton og katungod sa priesthood?

Unsaon nga makadawat ang usa ka tawo niini nga katungod?

Mateo 10:1 (Biblia, Bag-ong Tugon)

Juan 15:16 (Biblia, Bag-ong Tugon)

Unsay mahitabo kon kana nga katungod mawala?

Amos 8:11–12 (Biblia, Daang Tugon)

1 Nephi 13:24–29 (Basahon ni Mormon, mga pahina 35–36)

Nasayud ba ang mga Apostoles ni Jesus nga may usa ka apostasiya mahitabo?

Mga Buhat 20:28–31 (Biblia, Bag-ong Tugon)

2 Mga Taga-Tesalonica 2:2–3 (Biblia, Bag-ong Tugon)

2 Timoteo 4:3–4 (Biblia, Bag-ong Tugon)

Unsay pagsabut nimo nga ang ebanghelyo ni Jesukristo napahiuli pinaagi ni Joseph Smith?

Ang Pagpamatuod ni Propeta Joseph Smith (pamplet)

Unsa ang Basahon ni Mormon? Sa unsa nga paagi kini usa ka saksi sa balaan nga tawag ni Joseph Smith isip usa ka propeta?

Basahon ni Mormon pahina sa ngalan

Basahon ni Mormon pasiuna

Unsa ang buhat sa Espiritu Santo?

Alma 5:45–47 (Basahon ni Mormon, mga pahina 326–327)

Moroni 10:3–5 (Basahon ni Mormon, pahina 799)

PAGSIMBA UBAN KANAMO

DUOL UG TAN-AWA KON UNSAON SA GIPAHIULI NGA EBANGHELYO PAGPANALANGIN ANG IMONG KINABUHI



Ang sakrament miting mao ang pinaka-importante nga serbisyo sa pagsimba. Kini sa kasagaran molungtad og sobrag gamay sa usa ka oras ug kasagaran naglakip sa mosunod:

Mga himno: Giawit diha sa kongregasyon (Mga hymnbook ipanghatag.)

Mga pag-ampo: Ihalad sa usa sa mga lokal nga mga miyembro sa simbahan.

Ang sakrament: Pan ug tubig gipanalanginan ug ilibut ngadto sa kongregasyon agig handumanan sa Pag-ula ni Jesukristo.

Mga speaker: Kasagaran usa o duha ka mga miyembro sa kongregasyon nga gihatagan nang daan og tahas sa pagpamulong mahitungod sa hilogutan sa ebanghelyo.

Sinina: Ang mga hamtong ug mga batan-ong lalaki sa kinatibuk-an mag-sul-ob og amerikana o maayong pantalon pares ang polo ug korbata. Ang mga hamtong ug mga batan-ong babaye mosul-ob og sinina o sayal.

Mga donasyon wala itugot panahon sa serbisyo sa pagsimba.

Kami usab nagdapit kanimo sa pagtambong sa ubang mga miting, sumala sa imong interes ug pundok sa ka-edad. Ang paagi ug panahon niana nga miting mahimong maglain-lain.

Sunday School: Mga klase alang sa pagtuon sa mga kasulatan ug mga doktrina sa ebanghelyo.

Mga priesthood miting: Mga klase alang sa mga hamtong ug mga batan-ong lalaki nga nag-edad og 12 pataas.

Relief Society: Mga klase alang sa mga hamtong nga babaye nga nag-edad og 18 pataas.

Young Women: Mga klase alang sa mga batan-ong babaye nga nag-edad og 12 ngadto sa 18.


Primary: Grupo sa pagtinabangay ug mga klase alang sa mga bata nga nag-edad og 3 ngadto sa 11. Usa ka *nursery* alang sa mga bata nga nag-edad og 18 ka bulan ngadto sa 3 ka tuig kasagaran adunay gitagana.



Oras sa sakrament miting: _____

Address sa Chapel: _____

Unsay Akong Kinahanglan Buhaton?



- Magbasa sa Basahon ni Mormon.

Mga gisugyot nga basahon: _____

- Mag-ampo aron masayud nga si Joseph Smith usa ka propeta ug nga ang Basahon ni Mormon mao ang pulong sa Dios.
- Mosimba.
- Hunahunaa kon ikaw mosunod ba sa Dios pinaagi sa pagpabunyag. Petsa sa bunyag: _____
- Susiha ang www.mormon.org sa pagkat-on og dugang pa kabahin sa gipahiuli nga ebanghelyo ni Jesukristo.
- Magpadayon sa pagpakigkita sa mga misyonaryo aron makakat-on og dugang pa kabahin sa mga kamatuoran nga gipahiuli sa Dios pinaagi sa mga propeta karong panahona.

Sunod nga pakigkita: _____

Mga pangalan sa misyonaryo ug numero sa telepono:

ANG SIMBAHAN NI
JESUKRISTO
SA MGA SANTOS
SA ULAHING MGA ADLAW

www.mormon.org

Mga Pasidungog sa Hulagway

Atubangang hapin: *The Lost Lamb*, ni Del Parson. © Del Parson. Ayaw kopyaha
Pahina 5: Detalye gikan sa *The Prophet Isaiah Foretells Christ's Birth*, ni Harry Anderson
Pahina 6: Detalye gikan sa *Christ Ordaining the Twelve Apostles*, ni Harry Anderson
Pahina 13: Detalye gikan sa *The Restoration of the Melchizedek Priesthood*, ni Kenneth Riley
Pahina 14: Detalye gikan sa *Jesus Christ Visits the Americas*, ni John Scott

CEBUANO



4 02011 56853 9

01156 853